



**Polelo ea Mohlomphehi Tona-Kholo,
Dr Moeketsi Majoro Malebana le Phatlalatso
ea Meputso ea Basebetsi ba Lifeme.**

Maseru, Lesotho

Ka la 26 Motšeanong, 2021.

Basotho ba heso, ho fihlile tlhokomelong eaka ke le Tona-kholo ea `Muso oa Motlotlehi hore litaba tse amanang le meputso ea mathomo ea basebetsi ba lifeme, li nkile mothati o sele.

Ha litaba tsena li thomeha bekeng e fetileng, ke ile ka khetha Komiti ea Matona eo sepheo sa eona e leng ho sebetsana ka kotloloho le ho eletsa Letona la Khiri le Bosebetsi litabeng tsena.

Liketsahalo tsa maobane le kajeno li supa hore boemeli ba basebetsi ka mekhatlo ea bona bo ntse bo sa khotsofala.

Ke sa tsoa khokhohanya puo le Komiti ka sepheo sa ho fumana hore naa bothata ba ho tsoa hoa phatlalatso ea meputso ea mathomo bo hokae. Ke fumane hore phatlalatso e malebana le ho fumana maikutlo a Sechaba ka keketso ea meputso ea mathomo, e tla felloa ke nako ka la 14 Phuptjane, 2021. **Tšepiso ke hore phatlalatso ea meputso ea mathomo ea Selema sa 2021/22 e tla etsoa ka la 16 Phuptjane, 2021.**

Tsena li tla etsoa kamora hore Letona la Khiri le Bosebetsi le shebe lintlha tsohle tse kenyeletsang selo sa basebetsi le bahiri, joaloka ho se phatlalatsoe hoa meputso ea mathomo ea 2020/21, ekasitana le maikutlo a Sechaba ho latela molao oa basebetsi oa Lesotho.

**Ke qetella ka ho kopa Basebetsi ka mekhatlo ea bona ho fanyeha boipelaetso
ba bona e leho fana ka monyetla oa hore phatlalatso ea mapomela ea meputso
ea mathomo e tle e phethahale ka nepo.**

Kea Leboha!

Khotso! Pula! Nala!